

दिनांक 23.03.2023

समय 18.50 बजे

आकाशवाणी जयपुर-अजमेर

प्रादेशिक समाचार

- जी-20 रा सतत वित्त कार्य समूह री दूजी मीटिंग उदयपुर मांय पूरी व्ही- समूह री ई साल री कार्य योजना रा बारा मांय चर्चा करीजी।
- प्रधानमंत्री फसल बीमा योजना रा तैत बीमा दावां रे पेटे राजस्थान समेत छह राज्यां रा किसानां ने एक हजार 260 करोड़ रुपया ऊं बत्ती रकम रो चुकारो करी ज्यो।
- चित्तौड़गढ़ रा सांसद सी.पी. जोशी भारतीय जनता पार्टी रा नुवा प्रदेश अध्यक्ष बणायी ज्या।
अर
- शहीद भगत सिंह, राजगुरु अर सुखदेव री शहादत ने आज सिरधाभाव सागे याद करीजी-प्रदेश मांय केई कार्यक्रम राख्यी ज्या।

000

जी-20 रा सतत वित्त कार्य समूह री दूजी मीटिंग आज उदयपुर मांय पूरी व्हे ग्यी। मीटिंग मांय साल 2023 मांय समूह री कार्य योजना रा बारा मांय विगतवार बातचीत करीजी। इण मांय खास ध्यान देवण लायक तीन हलकां री पिछाण करीजी। आं मांय जलवायु वित्तपोषण सारू टैमसर जरूरी साधन भेळा करण ऊं जुड़यो तंत्र बणावणो, लगातार विकास रा लक्ष्यां सारू वित्तपोषण ने संभव बणावण अर ई सारू पारिस्थितिकी तंत्र रो बूतो बणावणो शामिल है। मीटिंग मांय वित्त कार्य समूह री चालू साल री कार्य योजना ने अमली जामो पहरावण रो लगभग आधो काम कर लियो ज्यो है। बैठक मांय जी-20 रा नुमाइन्दां बीचे आपसी तालमेल अर जानकारी साझा करण माथे ध्यान दियो ज्यो। मीटिंग मांय जी-20 रा सदस्य देशां, 10 न्योतो दियोडा देशां सागे 18 अंतर्राष्ट्रीय संगठनां रा 93 नुमाइन्दा शिरकत कीनी, जदके केई संगठन वर्चुअल तरीका ऊं शामिल व्हा।

000

केंद्रीय कृषि मंत्री नरेंद्र सिंह तोमर आज प्रधानमंत्री फसल बीमा योजना रा तहत दावा ऊं जुड़या डिजिटल मॉड्यूल री शुरुआत कीनी। ई सागे ई राजस्थान, उत्तर प्रदेश, हिमाचल प्रदेश, छत्तीसगढ़, उत्तराखंड अर हरियाणा रा फसल बीमो करायोडा किसानां ने एक हजार 260 करोड़ रुपया ऊं बत्ती रकम रो बीमा दावां रे पेटे चुकारो करी ज्यो है। तोमर कहयो के कहयो के फसल बीमो करायोडा किसानां ने हाल ताई एक लाख 32 हजार करोड़ रुपया री दावा रकम रो चुकारो कर दियो ज्यो है।

000

राज्यसभा रा सभापति जगदीप धनखड़ सदन ने बेहतर तरीका ऊं चलावण अर अड़चन आगी करण सारू आज न्यारी-न्यारी सियासी पार्टियां रा नेतावां सागे मीटिंग कीनी। मीटिंग मांय सभापति सियासी पार्टियां रा नेतावां ऊं सदन रा कामकाज मांय आ रही अड़चनां आगी करण री अरज कीनी। बजट सत्र रा दूजा दौर री सुरुआत ऊं ई संसद रा कामकाज मांय लगातार अड़चन आ रही है। भारतीय जनता पार्टी लोकतंत्र रा बारा मांय कांग्रेस रा नेता राहुल गांधी री टिप्पणी ने ले र वां ऊं माफी री मांग कर रही है, जदके विपक्ष रा सदस्य अडानी समूह रा मुद्दा री जांच सारू संयुक्त संसदीय जांच समिति बणावण री मांग कर रह्या है।

000

स्वास्थ्य मंत्रालय जनता ने सावचेत कीनो है के कोविड महामारी हाल ई खत्म नी व्ही है। देश मांय कोविड ऊं जुड़या हालात रा बारा मांय नई दिल्ली मांय खबरनवीसां सागे बातचीत करता थकां केन्द्रीय स्वास्थ्य सचिव राजेश भूषण बतायो के दुनिया मांय कोविड रा रोजीना औसतन 94 हजार मामला सामी आ रह्या है। वे बतायो के भारत मांय कोविड रा केवल 966 मामला है, जो दुनिया रा कुल मामलां रो महज एक फीसदी है।

000

प्रदेश मांय राइट टू हेल्थ बिल रे खिलाफ डॉक्टरां रा प्रदर्शन रे कारण मरीजां ने परेशानी रो सामो करणो पड़ रह्यो है। जयपुर, उदयपुर, कोटा, अजमेर अर जोधपुर मांय गैर सरकारी डॉक्टरां सागे

रेजिडेंट डॉक्टर ई प्रदर्शन मांय शिरकत कीनी। डॉक्टरां रा प्रदर्शन रे कारण आं जिला रा अस्पतालां रा ऑपरेशन टाळ दिया ज्या। ई बीचे प्रदर्शन करण वाळा रेजिडेंट डॉक्टरां ने संबंधित मेडिकल कॉलेज काम माथे आवण सारू कह्यो है।

000

चित्तौड़गढ़ रा सांसद सी.पी. जोशी भारतीय जनता पार्टी रा नुवा प्रदेश अध्यक्ष बणायी ज्या है। डॉ. सतीश पूनिया रो तीन साल रो कार्यकाल पूरो व्ह्या पाछे ओ फ़ैसलो करी ज्यो है। पूनिया रो कार्यकाल लारला साल सितम्बर महीना मांय पूरो व्हे ग्यो हो। सी.पी. जोशी ने प्रदेश भाजपा रा अध्यक्ष बणावण परां केन्द्रीय कृषि अर किसान कल्याण राज्य मंत्री कैलाश चौधरी वां ऊं मुलाकात कर र बधायी दीनी। जलशक्ति मंत्री गजेन्द्र सिंह शेखावत अर पैली वाळी मुख्यमंत्री वसुंधरा राजे समेत केई नेता सी.पी. जोशी ने शुभकामनावां दीनी।

000

राजस्थान सचिवालय सेवा अर राजस्थान सचिवालय मंत्रालयिक सेवा मांय अढ़ाई सौ नुवा ओहदा बणायी ज्या है। इण ऊं सचिवालय सेवा रा अहलकारां अर कर्मचारियां सारू तरक्की रा मौका बधेला।

000

जयपुर मांय आज प्रारम्भिक बाल्यावस्था में देखभाल और शिक्षा मुद्दा माथे दो दिन री कार्यशाला सारू व्ही। कार्यशाला मांय शिक्षा राज्यमंत्री जाहिदा खान कह्यो के एक ऊं छह साल री उम्र विकास सारू सब ऊं नाजुक मानी जावे है। वे कह्यो के बालपणा मांय देखभाल अर भणार्ई-लिखाई रा मुद्दां माथे सरकार खास ध्यान दे रही है। ई कार्यशाला मांय 18 राज्यां रा नुमाइन्दा शिरकत कर रह्या है।

000

देश आज शहीद भगत सिंह, राजगुरु अर सुखदेव ने वां रा शहीदी दिवस रे मौके सिरधाभाव सागे याद कर र्यो है। ई मौके प्रदेश मांय ई केई कार्यक्रम राख्यी ज्या। अलवर मांय भगत सिंह चौराहा माथे राख्यी ज्या खास कार्यक्रम मांय सामाजिक न्याय और अधिकारिता मंत्री टीकाराम जूली री मौजूदगी मांय देशभक्ति रा गीत अर कव्वालियां गाई ज्यी। झालावाड़ मांय स्वतंत्रता सेनानियां री याद मांय गढ़ परिसर ऊं मिनी सचिवालय तांई अहिंसा मार्च निकाली ज्यो अर सर्वधर्म प्रार्थना सभा राख्यी ज्यी। हनुमानगढ़ रा कलेक्ट्रेट परिसर मांय सर्वधर्म प्रार्थना सभा राख्यी ज्यी। ई मौके मोटरसाईकिल रैली निकाली ज्यी अर खूनदान शिविर लगायी ज्यो। नेहरू युवा केंद्र री ओर ऊं अहिंसा मार्च निकाली ज्यो। टोंक जिला रा देवली अर मालपुरा मांय पैदल अहिंसा मार्च निकाळ र शहीदां ने याद करी ज्या। करौली और नागौर में रक्तदान शिविर का आयोजन किया गया और रैली निकाली गयी। भीलवाड़ा मांय "सलाम-ए-भगतसिंह" कार्यक्रम राख्यी ज्यो, जिण रा तैत मैराथन दौड़ व्ही। चूरू मांय इन्द्रमणि पार्क ऊं अहिंसा मार्च निकाली ज्यो। प्रधानमंत्री नरेंद्र मोदी ई मौके भगत सिंह, राजगुरु अर सुखदेव ने सिरधाभाव सागे याद करता थकां ट्वीट कर र कह्यो के भगत सिंह, सुखदेव अर राजगुरु रा बलिदान ने देश हमेशा याद राखेला।

000

भगवान झूलेलाल रो जन्मोत्सव चेटीचंड आज हरख उमाव सागे मनायो जा रह्यो है। ई मौके प्रदेशभर मांय न्यारा-न्यारा कार्यक्रम राख्या जा रह्या है। जयपुर मांय चौगान स्टेडियम ऊं शोभायात्रा निकाली ज्यी अर झूलेलाल मन्दिरां मांय खास कार्यक्रम राख्यी ज्या। ई मौके भगवान झूलेलाल रो पंचामृत अभिषेक करी ज्यो। बूंदी मांय वाहन रैली निकाली ज्यी अर झूलेलाल चौक माथे प्रसादी बांटी ज्यी। टोंक मांय सिंधी समाज अर सिंधी महिला शक्ति री ओर ऊं वाहन रैली निकाली ज्यी।

कोटा मांय रामतलाई मैदान ऊं शोभा यात्रा निकाली ज्यी। उदयपुर अर झालावाड़ मांय प्रभात फेरी निकाली ज्यी अर न्यारा-न्यारा धार्मिक आयोजन राख्यी ज्या। चित्तौड़गढ़ मांय केसरिया साफा बांध र भगवा झण्डा सागे वाहन रैली निकाली ज्यी। दौसा मांय भगवान झूलेलाल रा जयकारा सागे न्यारी-न्यारी ठोडां शरबत बांटी ज्यो।

000

प्रदेश मांय आज लोकपर्व सिंजारो धूमधाम सागे मनायो जा रह्यो है। गणगौर रा एक दिन पैली मनाया जावण वाळा ई पर्व माथे लड़कियां अर महिलावां मेंहदी लगा र सौभाग्य री कामना करे है। ई मौके राज्य मांय न्यारा-न्यारा कार्यक्रम राख्या जा रह्या है। बाड़मेर मांय महिलावां मांय खास उमाव बीचे घुड़ला नाच रा कार्यक्रम राख्या जा रह्या है। काल गणगौर रो पर्व रीति-रिवाज सागे मनायो जावेला। जयपुर मांय काल गणगौर री शाही सवारी अर परसों बूढ़ी गणगौर री सवारी निकाली जावेला। प्रशासन

री ओर ऊं हिफाजत अर कानून व्यवस्था बणायी राखण जरूरी प्रबंध करी ज्या है। जयपुर मांय काल भरण वाळा गणगौर मेळा ने ध्यान राखता थकां काल आधा दिन री छुट्टी रो ऐलाण करी ज्यो है।

000

रमजान रो पाक महीनो काल सरू व्हेला। हिलाल कमेटी रे मुजब काल चांद निजर नी आयो, ई कारण ई पैलो रोजो काल राख्यो जावेला। एक महीना तांई रोजा राखण पाछे ईद-उल-फितर रो त्यौहार मनायो जावेला।

000

देश रा गांवाई हलकां मांय कोई 59 फीसदी घरां मांय नळ रे ज़रिए पीवण रो पाणी पूगायो जा रह्यो है। जलशक्ति राज्य मंत्री प्रल्हाद सिंह पटेल आज लोकसभा मांय एक सवाल रा लिख्योडा जवाब मांय आ जाणकारी दीनी। वे बतायो के कोई 11 करोड 49 लाख घरां मां नळ रे ज़रिए पाणी पूगायो जा रह्यो है। पटेल कह्यो के जल जीवन मिशन रा तैत लारला साढे तीन साल मांय देश रा गांवाई हलकां मांय आठ करोड 26 लाख और घरां मांय पाणी रा कनेक्शन दिया ज्या है।

000

अंतर्राष्ट्रीय मोटा अनाज वर्ष 2023 मांय मोटा अनाज रा प्रति जाग जगावण सारू आकाशवाणी समाचार जयपुर री ओर ऊं नुवी श्रृंखला चलायी ज्यी है। आप आकाशवाणी जयपुर रा व्हाट्सएप नंबर 9414052368 माथे संदेश भेज र रोजीना रा खाण-पीण मांय ज्वार, बाजरा सरीखा मोटा अनाज काम लेवण रा बारा मांय बता सको हो। आप संदेश रिकॉर्ड कर र या मांड र भेज सको हो। आं मांय ऊं कुछ संदेश समाचार बुलेटिन मांय प्रसारित कर्या जावेला। जोधपुर रा गोविन्द प्रकाश दाधीच वां रा संदेश मांय मांड्यो के राबडी काम लेवण ऊं वात, पित्त अर कफ री परेशानी दूर करी जा सके है। वे मांड्यो के सियाळा मांय उन्नी अर उनाळा मांय सीळी राबडी काम लेवणी चाहिजे।

000